

# KONZERVACIJA I REVITALIZACIJA SPOMENIKA KULTURE, STARIH I HISTORIJSKIH URBANIH CJELINA U EVROPI

*Antun Bauer*

*Centar za postdiplomski studij muzeologije, Zagreb*

Pod naslovom Konzervacija i revitalizacija spomenika kulture, starih i historijskih urbanih cjelina u Evropi su izašle bogato opremljene publikacije na engleskom i francuskom jeziku u nakladi UNESCO-a (u tisku je ista publikacija i na njemačkom jeziku).

Publikacije, na 394 odnosno 402 stranice bogato su opremljene ilustracijama i informacijama o rezultatima akcije UNESCO-a, ICOMOS-a i ICOM-a za čuvanje i revitalizaciju spomenika kulture, muzejski korištenih spomenika, kulturnih i historijskih objekata, starih i historijskih urbanih cjelina, ambijenata i kvartova.

Akciji, koja je potaknuta na 19. Generalnoj skupštini UNESCO-a u Nairobiju 1976. godine, pridružilo se dvanaest zemalja Evrope — s Kanadom — u svrhu zajedničke suradnje. Na skupštini je proklamirana preporuka UNESCO-a za očuvanje i zaštitu historijskih spomenika i ambijenata te njihova uloga za budućnost. 1977. godina bila je proglašena i međunarodnom godinom zaštite spomenika kulture.

Između dvanaest zemalja koje su se deklarativno uključivale u ovu akciju zaštite i revalorizacije spomenika bila je i Jugoslavija. Na žalost, u citiranim publikacijama zastupane su bogatom dokumentacijom o realizaciji ove akcije sve zemlje osim Jugoslavije. Jugoslavija je prezentirana samo u prilogu pregleda o akcijama na zaštiti historijskih urbanih cjelina.

U prilogu svake od publikacija tiskane su i rezolucije, proglasi, apeli i preporuke upućeni članicama UNESCO-a s 19. Generalne konferencije. Konkretnoj akciji u godini zaštite spomenika kulture pridružili su se, uz Jugoslaviju, još i Belgija, Bugarska, Engleska, Francuska, Grčka, Italija, Kanada, Mađarska, Nizozemska, Poljska i Zapadna Njemačka.

Kako su ove publikacije i dragocjeni prilog manjkavoj stručnoj literaturi, od neposrednog su interesa za naše zavode za zaštitu spomenika kulture, a također i za muzejsko-galerijske organizacije — prvenstveno za zavičajne muzeje — to damo i informaciju za nabavku ovih publikacija (uz vrlo pogodne uvjete i uz simboličnu »zaštitnu cijenu«).

Za publikacije na engleskom i francuskom jeziku distribuciju vrši: UNESCO — Region Europe — 75732 Paris, 1 rue Miollis, Francuska, a za publikacije na njemačkom jeziku — UNESCO Kommission, 5300 Bonn 1, Colmannstr. 15, BRD (Zapadna Njemačka).

(Informacija iz Biltena UNESCO-a, II, 1981.)